

四庫全書

集部

欽定四庫全書

平齋集卷三十一

宋 洪咨夔 撰

墓誌銘

吏部鞏公墓誌銘

靖康建炎間中原學士大夫多避地南徙鞏至自東平
呂至自東萊愛寶婺溪山之勝家焉地偏俗古文物未
振山堂鞏先生首以北方之學授徒著錄幾數百人呂
成公繼講道明招精舍負笈全集聲氣薰浹淵源濡漸

類為世聞人公諱嶸字仲同山堂季孫成公門弟子也
幼神氣明粹風骨凝重大父愛其似北人曰必昌吾宗
長偕兄豐執經明招鈎邃摘幽神接心領出語輒破的
同舍歛衽避其鋒中淳熙二年第授嚴州建德尉調淮
西總領所準備差遣以格知徽州歙縣憂免起知處州
麗水縣當路交薦其材入提轄推貨務都茶場幹辦諸
軍審記司遷太學博士進大理寺丞出知嚴州未踰月
改邵州擢都大提點坑冶鑄錢司職事修舉直秘閣因

其任七十餘年曠典也除侍右郎官以煩言畀武夷祠
起家知温州擢江西轉運判官比年丐閑有旨入奏未
行除司封郎官罷奉鴻禧祠祠滿檢會續食而春秋寢
高浩然已忘世故垂車得請日杖屨溪山間弄花漉月
昌羊忘返曰佚我以老上恩深矣寶慶丁亥三月庚申
終於武夷里第享年七十有七積階至中大夫爵須城
縣開國男食邑三百戶初尉建德世其官拯溺字荒不
遺力父老謂有祖風淮西總臣被命築歷陽倉修采石

戰艦及體訪沿江軍政舉以委公條畫詳明悉當上意
一日大軍庫延燎拔幟登屋周麾而呼曰燿士力者賞
衆奮火撲觀者勇之歛十有八鄉訟牒叢夥公日聽鄉
二操約御詳庭空如水麗水以撫字寓之催科如治歛
前積負郡逋累百萬郡胥利其稽索縣賄縣胥乘其索
以重民擾公曰此無補於州而厲民以飫吏可乎力白
守刊其籍編戶以役破家者相踵為去所以蠹役者民
爭應恐後東南仰茶鹽為國計三推務總於轄官討尋

源委如理家事吏莫敢欺歲入數倍富商木棧之訟府
尹掣於交謁改屬於理公當承鞠慨然曰天獄臨安府
可乞送耶避嫌止當送鄰路白於朝從之審計輪對論
催科管榷之弊甚力暨為學官適有詔以火災求直言
謂學校公論自出不可徒應故事上書陳時政闕失多
所指切大略謂兵端不可開權姦忤矣未幾予郡陞辭
論外攘當先內修復寓兵不可輕用之意自信不撓朝
譽籍甚江右劇賊方棘邵與溪洞接蠻徭性狙易動至

即增埤濬隍肄射繕甲以折姦萌發儲勸分置六十四
場贍恤飢羸一郡帖然治司孝宗朝定鑄額歲十五
萬緡後寢虧額六不及一公推原弊端知楮輕卅重售
不酬費故入少而鑄虧乃使楮與卅各時其直輕重足
以相權坑丁競勸卅務倍入先是冶卒窳惰多遺卅泥
滓中有司莫之察公置局淘洗所得皆精良於是盡還
故額俄兼憲節積潦薄番城民廬半沒葉舟掀舞家訪
戶歷周卹之見者引手加額永嘉始至訪名儒之間問

所宜先以海瀕逐末者衆首勸民務本業適歲大比增
闢貢闈以受多士士狃積習以逞試之三日躬警護於
棘外有貴游子挾醉號呶道上莫敢何亟械於市曰士
不自愛者視此訖事無敢譁榜揭校藝官例亟行緩則
羣譟遮境上生可否公故留宴至累日乃去前所未有
也時嚴海道之防得旨造蒙衝二十艘掾屬請下諸邑
公不可捐利誘海商二十人人造一艘按期辦集符不
及民漕臺以官軍討捕劇賊日費共億公私告匱公綜

理綱條補室罅漏漕計裕而民不知和糴至百五十萬斛皆商賈願出於市盡草敷配之弊十一州上供歲團綱六有無相影數多虧公區別窠名使不相紊卒復其舊豫章一再攝閫歲和物阜政平訟簡時往來東湖書院與諸生以義理之學相講明士風為起釋奠帥守宿學必露必以衛曰此何為邵之士服其知體去之日邦人揭幟追送擁車後先有經夕不能舍去者性靜正夷博居官未嘗澤辭色貫聲光以媒進而儒術吏能每為

時所不舍與人不植岸異周旋委曲惟恐失一士之心
至不為利回義疚雖議其介不顧也平居細謹動中微
墨及倉卒應變多出度外邵陽番汭江右凡三斬薊卒
弭患未萌其識權類此為政務因其俗未嘗容心終歸
之愛利民多繪像祠之始生踰月而孤與兄相依為命
白首無間言母楊夫人通孝經論語毛詩大義所至奉
板輿行日請所以為政如升角口授章句時鄉黨稱其
孝愛書一過目終身不遺忘作文期於有用非精粹不

輕出有厚齋文集八十卷藏於家其先出晉士莊伯世
為真定人後徙鄆曾祖燾左奉議郎贈通奉大夫祖庭
芝左議郎贈太中大夫父法贈正奉大夫娶何氏繼高
氏先卒皆贈令人子友聞儒林郎台州司戶參軍孫端
祖從事郎江州瑞昌縣尉次延祖孫女一曾孫男女五
紹定己丑正月庚午朔諸孤葬公於金華縣壽溪原友
聞以某辱公知最早重趼請銘嗚呼柳下惠聖之和者
也而三公不易其介卒窮於三黜公遭時且鄉用矣雲

出輒還膏施未光其囿於命也耶銘曰

可欲之善莫難於有中庸之德莫難於久何以有之典
則世守何以久之源流師友公祖山堂而師東萊學實
體用根幹條枚氣定心夷求福不回橐篋再節用不盡
材孰虧孰成蛻和委順易簣琅然忠孝其訓有苑彼阡
山暉木潤過者式之我耆壽俊

亡弟子文壙誌

洪氏世居潛山之谷口大父年二十四生我伯父鑑伯

父亦以二十四生我弟琥皆冢嗣也琥字子文生於淳熙丁酉二月丙子後余一歲幼嬉戲相逐長同就外傳既而予忝一官檣浮轡走冒喘膚汗曾不免於窮子文循分理生足不趼胥不折而疆畎日斥塗甌日華林沼日蕃俎鮮以奉親簞書以教子優游卒歲兩忘榮辱余未嘗不欲其計之得也其為人修幹豐下而髯行已恪與人信磊落明白不為深險操切且退然若虛里黨推重寶慶丙戌四月辛卯以渴作一夕不起莫不惋惜之

母妻皆增口阮氏男二人日卿庶孫三人尚幼母夫人
慈而肅禮法行於家春秋七十有六失壯子悲不自勝
末疾增劇明年九月己亥卒又明年正月壬辰次子璞
偕日卿塋夫人於家山鳩起之原從夫兆同日葬子文
於西鳩相望三里所兄某攬涕叙其平生納諸壙

高朝散墓誌銘

嘉定辛巳壬午間成都通守高才卿泰叔以文學器能
為西閩賞重某時員外置間與聞末議回首十寒暑矣

其守三嵎崎嶇走書天目下為言先君子即寔有年識
竈之文猶未也蜀非無宗工可屬必公諸東南庶幾信
百世子好我敢請案高姓派於齊占籍卽蒲江者世有
隱操珣生孝立孝立生興國嘗大書於屏訓子孫學以
忠信孝弟為本君其長子也諱澤字叔淵少朗悟絕人
書一再過成誦荀楊氏韓柳氏漢唐三國南北諸史皆
手抄是非得失反覆究見根極而折以經鄉先生趙澣
深可之浸尋不偶退謂其子曰基之以孝悌植之以忠

信培之以至誠無息天終阨我哉未幾子策名奉常君
喜見顏面曰天所逸我也屏舉子業不復省輕車就養
笈書以自隨所至雋父系踵請益危坐縱論要其歸於
涵泳孰復而自得幅巾蕭散當路欲一見輒謝去不喜
誦佛氏書而戒殺嚴甚曰物我俱生天地間同一氣也
用心憺怛類如此開禧丙寅夏啓手足於普慈郡文學
官舍春秋六十有二累贈闕郎娶韓氏事姑婉恪能
得其懽心間君客游手課其子容止服御有常度里黨

尊為婦則先君十八年卒贈恭人葬仁惠鄉龜山阡從
舅姑也君兆卜向六門惟乾食相距三里而近丁卯蜀
變淺殯故廬西丙子四月乙酉廼克葬一子即泰叔今
朝請大夫知嘉定軍府事一孫允績某官曾孫男女若
干人士求仁之方莫切於孝悌忠信四者秉彜所鈞有
甚易知易行也往往由之而不知何哉學失其傳爾君
得一語之傳於家庭知之至守之篤朝夕省飭欲天理
之在我者皆實而無偽其志於仁矣乎明善誠身上可

以順乎親則下可以穀爾子宜其至嘉定而大也銘曰
切已之學莫如求仁求仁維何誠善於身孝悌其本忠
信其質仁莫近焉落華取寔翼翼縣縣是似是傳榮光
漏泉何千萬年

二鍾君墓記

臨安亭川鍾氏景常生子淵子淵生福州助教億億二
子長貴州助教俊卿字子明次將仕郎仁卿字子壽子
明娶徐氏生端理蚤卒次端詳一孫與齡子壽娶龔氏

生端謨端誼二女適施大用龔英二孫道齡佑孫子明
忼慨機警遇事無留難子壽通而敏文多成誦生相後
十年志鈞才耦以力業相摩厲凡所規畫兄不自謀必
以咨諸弟弟剴度可否聽兄決之壘倡篴和如出一人
以故積居懋化中權而獲厚生理既裕又相與以輕財
急義聚書樂教為聲華勝士往往願交邦大夫亦賓禮
異等居旁池園深秀結堂竹石間扁以世友暇時相携
娛娛華髮交映兒姪迭起奉觴為壽雍如也子壽年六

十有四以紹定庚寅十一月晦卒越明年八月五日子
明卒得年七十有五二君無恙時誓生無異廬死無異
兆治壽窆於新安鄉南山之原右左以序至是同卜以
其年十一月丙申葬焉惟孝友於兄弟知孝於其親而
思手足均父母之遺體則能友矣兄弟之子猶子也知
伯叔父即吾父從兄弟即吾兄弟則能世其友矣子明
子壽之友後人盍求以世之乎嗚呼和樂而家道昌曄
疑而外侮起又可不懼乎余探二君友愛之情併誌之

使其子各刻一通藏諸墓以慰九原云

羅迪公墓誌銘

行於蠻貊易行於州里難行於閨門尤難愈近愈不可
矯也三代直道微俗日益薄有能積忠恕平實之踐使
鄉人尊家人親而化耳目所接得臨安羅君介圭元度
焉曾祖將仕曉祖文學彪父將仕若濟聚族以恩義相
陶浹三世不異居君意承厥考弗懈偕夫人厯苦節約
以奉烝嘗酬應内外一簪弗營其私倒已橐且弗勒而

量淺機深之戒每為子姪誦之肅雖一門自為師友升
其堂詩書之聲鏘如也紹定甲寅水穀價騰躍道殣相
枕前是里中貸子錢者計緡累萬君歎若救死不贍何
忍更責若償裒券焚之他歲饑疫率推食饋藥以振羸
乏惟恐不我聞鄉鄰信其長者有訟不之有司而之君
取平相踵也人性皆善氣質厚薄則有不齊而行事因
之君於善利取舍之間擇明而守確既行於其家又行
於其鄉得天者厚矣歲癸卯蓮異葩同拊擢於沼而子震

龍生壬午玉燕巢於庭辛卯異竹產於書塾之廡義方
發祥蘭院競爽震龍聲撼膠序舍選以優升君時七袞
遭逢慈明大慶遂被初品封天於厚德之報未垠也明
年二月乙卯以微疾考終於家巷哭多失聲十一月庚
申葬平西上沈塢夫人先六年卒同兆子男四震龍正
奏名進士次友龍從龍一龍女四適俞元龍俞鎔吳伯
振郎應午孫男六女二銘曰

盡已忠乎推已恕乎踐其著乎處其裕乎噫庶乎元度

乎

吳致政墓誌銘

東朝慶霈臨安吳君孝先謙仲以子元卿為太學諸生
封初品官越再歲紹定癸巳春正月壬申卒壽六十有
八先是君未屬纊晨起語家人吾夢遊穹林邃洞三茅
君命之坐殆非久於人間世者自今勿以肉食進越半
月曰吾殆病矣四肢百骸無所苦而胃少弱自今勿以
粒食進惟日飲參棗湯兩瓦瓶又半月曰參棗煮湯固

佳未免烟火氣棘人第汲井花水飲我可也如是者又
半月水不復飲矣脩然一榻神怡氣明親交省候人人
起道寒溫叙慇懃去則執手訣別以寡慾延年樂善受
福為勸哈殮葬祭纖悉治命忽整衿曰吾苦目青累年
今劃若開明亟取筆來書頌甫畢而坐瞑莫不異之君
讀書務實踐耻為口耳之學晚倦游場屋移志道書得
谷神琴心之旨每謂其說與吾儒同歸手梓孔子子思
孟子仁義孝弟之訓自出機杼纂為科典亡慮萬餘言

冠佩宣誦聽者竦立家事付諸子深居燕坐飛神御氣
排膠葛而泝沉寥超搖八極之表水旱綠章精禱雨霽
遲速言輒驗靜則虛虛則明故也性冲澹不忤競而篤
愛敬治家嚴而有節端默堂皇內外無履聲待人接物
恕而慈嘉定己巳大疫暴骸莫拚君募致累萬舉佛老
會歸之明年歲大祲道殣相枕首發私廩為粥以食餓
者巨家相率致助全活不可計又明年穀騰躍猶故盡
出伏臘之儲捐直以糶為鄉里先而包黍以遺饑紉絮

以濟寒和藥以拯病歲其常也人有善誦美如已出有
不善惻然閔其失本心見義勇前苟利於衆不退顧見
賢起敬起慕不暇隣曲小故傷和雍容談笑以平其忿
而人犯之不校親族以事咨訪立為劑量輕重使不失
準雖童稚必拱而忠告其篤於信道而誠於善自少壯
至老猶一朝夕也卒之日鄉閭遠邇嗟惜不容口室鍾
氏先六年卒墓在福昌玉泉山君以其年八月甲申合
葬焉曾祖某祖某父某將仕郎男五元卿和卿舜卿舟

卿德卿皆業書二女適進士鍾甫錢克俊孫男七人道
家以清淨自然為宗致柔返樸而虛其心所以求道也
東郭順子人貌而天虛緣而葆直清而容物深於道矣
君中扁虛明內行純固盖淵乎似之委蛻乘化宜有以
異於人哉某省族牀下屬以幽竈之銘掛劍之義不可
寒也銘曰

深根寧極絕外營危坐內照虛白生龍章虎錄提玉衡
鞭風駕霆溘上征九光前導八景迎祇歎寥陽朝通明

紫皇潛簡一念精瑤宮璇臺敕標名積功滿千道紀成
拍手下招僊人盈獨騎黃鶴凌太清遺劍墮烏搖寒晶
雲氣紛蔥護佳城

郎迪功墓誌銘

余自郎曹以言事謫僑居西市距君舍二里所嘗過君
飲君時已七十餘姿狀厖艾髯髮盡白酒酣慷慨道平
生經行山川之險易風俗之媿惡及可喜可愕事纒纒
有本末且言開禧初淮楚驛騷身在圍城中間以奇畫

干主帥用輒中圍解欲官僕掉頭挾所得胡人弓矢徑
歸每北風塵起拂絃撫筇猶踴躍自喜恨不獲窄袍快
馬蹴踏冰雪効驅馳也語畢目光炯然如秋隼之欲擊
意甚壯之問君何以不從戎曰吾宗本詩書家也景德
六年遠祖簡登進士第仕至工部侍郎名在國史衣冠
中絕落莫幾二百年物久鬱必怒奮貨久居必暴羸僕
少游四方閱人多視諸孫當有以儒科進者歸出橐中
裝延師教之晝綜理事夜張燈挾筴坐孫輩旁吟諷

與相應和老者未寢少者不敢懈以故偉俊能力學於
紹定壬辰同忝科第以續前脉僕藉是亦偕初品孰與
鵷冠多因扣君養生以何術曰寡慾安生以何術曰寡
怨治生以何術矍然搖手曰是非考功所當問老夫亦
不能語考功也余今浮湛周行媿且病念君涉多而見
博年耆而識明治魚畦卉可以永日欲歸效太史公訪
所過長老從君執筆記所聞而遽以不起訃噫惜哉君
郎姓在漢為安丘人在魏為中山人唐五季以來世為

杭之臨安人贊生瑤瑤生孜孜生君君諱思字伯永性
明直無機械事母孝老彌篤撫鞠猶子盡恩平居意色
沉毅閨門整暇與人言是是非非不苟同臨財義不立
責券而樂周急生以紹興庚辰卒以端平乙未十一月
八日娶章氏封孺人男三謙詠該季早卒女嫁施廷祀
孫男七偉前紹興酒官儀倅及新慶元市舶務儼僑備
孫女四曾孫男女十二卜以明年三月壬申葬君於章
塢先域偉及奉大母命來乞銘曰曾大母嘗得銘大父

不得銘寧不葬惟先生哀憐之因次第其說系之銘曰
動以順乎時為富靜以安乎命為壽四世而林立一科
而岐秀其藝之深封之茂也夫

平齋集卷三十一

欽定四庫全書

平齋集卷三十二

宋 洪咨夔 撰

祭文

祭俞侍郎文

中興倫魁爲奕顯融穎出天京橫浦與公公殖其學裏
腴表豐井養厥德用汲不窮匪矯爲崖春陽茸茸溫作
之厲飛霆駕風匪阻爲巖晴波溶溶平激之躍驚濤轟
空肆爲文章齋淪春容麾屈軼宋轅遷軼雄發造化篇

為世迪蒙萬象專與與天為功再入西掖筆老逾工鼓
舞八極渾噩婉隆矧拘勁節志為志帥翼如冥鴻碧落
無際有氷其山衆倚而睨有蜜其必衆嗜而濟公乎閑
閑表立一世卷舌方棘獨犯其銳岸不受馴噬焚以噬
采荼羅山其甘勝薺大明中天攘屏霾曠帝趣公歸不
奪彌勵胡為孤憤菟結憊憑任重道遠竟死弘毅翦焉
諸生淑艾一藝中流失楫夫誰與濟丹旆悠悠遮道哭
酹匪私之悲邦國殄瘁

龍州新建武侯祠堂祭文

三綱五常之理與卑高俱陳其數也時其存也人周衰
吾夫子作春秋書盜書叛一辭不貲而亂臣賊子懼公
以賊名魏迄能倡天下之大義扶天下之大倫此聖賢
所以有功於人極而百世其仁也夫以公之功在天下
仁在後世豈蜀得而私之蜀之薦紳大夫父兄子弟維
公之訓用能不為鬼蜮之魏而為漢宜其德公之深歷
千百祀而常新夔巫以東瀘黔以南岷峨以西劍棧以

北莫不家社而戶稷嘗秋而禴春江油獨無公祠而祠
鄧艾是知攸攘之盜而不知慕鞠復之親知用物精多
之為厲不知正直聰明之謂神方艾繼兵無人之境行
險僥倖特乘漢運之屯耳魏為漢賊晉為魏賊三尺童
子皆知之艾顧嗾昭挾魏以憾漢漢亡而魏亦亡天彝
泯矣小有材未聞君子之大道適足以殺其身安能禍
福爾民哉某始至毀艾祠垂去祠公於遺址之西而丹
青之背甲而腹壬羽扇而綸巾魚復彌牟之八陣龍騰

虎躍左揖右拱可駭可愕而不可馴於以鑰疑牖蔽勸
不二心之臣栢溪齋淪玉平嶙峋公分來妥椒馨醑醇
祭莊侍郎文

嗚呼三代而下何其正且大之難耶西都之士如洞庭
彭蠡滙衆川以為容非不大也未見砥柱千仞截齧乎
頽瀾東都之士如峨眉太白拔地而峭立可謂正矣所
少者吞雲夢若八九之寬公造萬里之根極含一真之
胚暉道大學而中庸文五誥而三盤望之閑閑炙之溫

溫扣之盤盤風停水止渺不知其孰倪孰端及義形於
色凜不可干則孤峰絕岬坐睨乎橫決而崩奔大而不
失之靡正而不流於隘蓋三代人物之遺也奚兩都之
足論去玉堂其歸乎寥芙蓉而飲蘭歟帝所之謂來徑
御風而不還功在斯文名在太史於公乎何憾寬兮綽
兮瑟兮憇兮其如四海善類思君子之不可諉某出入
函丈十五暑寒每進而誨之必曰敬立而內直義行而
外方然後可以闡聖賢之門忽梁木之告壞撫張紳其

永歎遡秋風而一酌誰與作於九原

祭程廷邁文

嗚呼廷邁君坤之垠我巽之濬氣貫脉應傾蓋忘新泛
東津之月踏西岑之雲盡日乎醑醺芍藥之春相瑩以
虛相熙以真上下數千祀之論議沉著痛快眉一伸而
百顰是何貌之臞而精神之敷與言之溫而肝膽之輪
囷信抱負之不凡縑蒼璧其純綸見乎文采政理者特
臯蘭之餘芳山風吹衣馬首劃分胥命維何禁柳壑闔

無何我斥而君已招覓大江之濱嗚呼人之生也氣日至而滋息其盈也氣日反而游散皆不離乎陰陽往來而屈伸伸而為物屈而為變魂升魄落既化而無有矣根於理而日生者固浩然與天地而長存况君定靜而明明清而凝宜與根於理而日生者相為無窮乘雲御飈橫八極而憂九旻杳銘旌兮西還嘻有子兮應門寄一酌於江風眇離索其酸辛

祭鄒都大文

中興百年人物雲蒸大江之東以氣骨稱宮亭彭蠡藍
田昆丘公於其間琅玕天球絕明而剛平直而方落華
取實錦衣聚裳力回萬牛氣凌三軍宴坐觀來堅壁挫
紛奔鯨蕩海奔濤矗空千艘辟易獨抗逆風雷電晦冥
劫火漲天萬瓦俱破浮屠屹然見危致命衆雌我雄在
蹇六二王臣匪躬上功莫府我醒衆酣勞而不伐應謙
九三蜀控遼夏人為金湯探囊取橐神旗央央潼關函
谷秋風扇腥籌筆未試前軍墮星矍鑠如援能飯如頗

一朝至斯於理則那巴秦父老齋咨同詞東南諸生矧
公所竒矩度在目誨言在紳一酹寄悲天乎不仁

靈澤侯生日祭文

龍州

惟神炳山川之靈司一方之命不知其幾祀矣誕彌厥
月秋以為期民猶生事之欲神之福民無窮也某敢為
民奉觴上萬有千歲之壽

老人祭疇甫文

嗚呼天目之陽翼翼鱗鱗道同味合吾三數人溪光澹

暮野芳炫春孰賦不旅疇觴不賓老瓦遞肘柴車共巾
山中之樂白頭一真年過六十氣壯意新期之歲寒開
我甯陳君遽舍我如蚤脫輪我不見君如釣失緡村南
村北梅笑柳顰扶筇出門誰與問津嗟彼有司賤玉貴
珉老死不售連城之珍此在疇甫達觀屈伸而我所悲
殘星向晨銘旌飄搖寶華輪茵斗酒隻鷄遮道酸辛

鍾惠叔哀辭

并序

惠叔臨安人諱應僑與予內同母余仲女其子阜婦也

君蚤敏悟絕人讀書日千言場屋屢見頭角氣盛志勇
風進飄駛得前輩格言題滿屋壁坐卧與對伊洛諸老
書多隱括為歌詩時時自諷詠以苦志得奇疾每發輒
神游六虛驂轡鸛鵠與浮丘安期相後先寤則索酒酣
飲耳熱浩歌吸呼月露以盪胸中之崢嶸幾豪矣而操
行純白與人交無貴賤皆盡情奉重闡惟恐少嬰其和
喪母過哀悴以死年止四十有五吾黨共惜之余敗官
寄廬西廛與君周旋作暖熱至未幾君舍之去可勝歎

哉葬有日為賦哀辭相樞緯且以塞余內余女之悲其
詞曰

凡託形於溟滓兮藐起滅於一漚前乎名世之既往兮
後方來而未休來者不我接兮往者不我留譬草木苟
吾臭味兮攬而祛以寫憂便儼嶽嶽之紛前兮歸斯人
之好修凝乎其觚而不堅兮澹乎其靚而不浮素忠信
以為絢兮張詩書以為羞索珊瑚於海若兮采夜光於
昆丘默會心其躍如兮獨起舞而長謳樂得朋而講習

兮甕未蛆其已窮暖澗兮泉瀏淒巘兮雲幽松矯矯兮
雪明柳濯濯兮烟柔君其蘭亭竹溪人物之儔耶胡思
瓠神放而莫收若士聳身八景之上兮禦寇冷風而跨
九州排赫羲與超搖挾鴻濛與夷猶頰人褰而隘之不
啻蟻蛭蜂牖蠅蠊而蜉蝣也徑御母於少廣之庭謁帝
於碧瑤之樓世之壽者未必薰兮夭者未必蕝蒹葭老
於霜露兮胡梧桐之不能秋豈冤氣聚散之靡常兮聽
推遷而幹留抑百鬼常瞰乎高明兮三彭甘心乎爾仇

不然萬物芸芸各歸其根兮塞彼蒼尚奚尤薄寒兮梅窩
嫩涼兮荷洲佇立以望兮君不來有酒不樂兮謂我何
求嗚呼天乎何奪吾良之亟兮孰論心乎白頭

祭孫漢州文

嗚呼君宣我杭共此天目竹西定交日稔月熟清不失
和惠濟以肅韞抱國器涵停民福越在庚辰太少擇牧
旅鶴與琴萬里追逐曉鼓齊發暮燈分宿短髮相扶蘆
花映燭風恬日舒前山迎綠推蓬喚酌爛熳魚菽雲變

風怒雪浪翻屋更呼遽號投岸掉舳瞿唐灩澦奔濁飛
鏃舟失毫釐蛟鬪鼉腹巾子桂林峭磴危巔牽車青冥
於菟起伏脫險趨曠秀水佳竹交口勞苦挈命博祿頻
年過從分誼骨肉綢繆勸酬低鬟度曲我守江油君倅
綿谷相望幾驛靡善不告莫府奏功荆坡解蜀我踵而
東君薦華轂風槩絕世等視榮辱尉薦寂寥駢函索幅
政平如水行粹如玉謂壽而臧胡奪之速皦皦名污落
落起巖人不勝天天定斯復江颺有靈穩送歸鵠所不

滿君早訪松菊西望敬亭設位慟哭平生故人安得正
叔嗚呼哀哉

諸父堂祭妣徐夫人文

嗚呼哀哉吾父早孤獨當門戶渺然世業危如一縷所
賴協濟其不及以相其成惟有吾母中寬而外和上順
而下撫螽斯之德薰浹於閨門鴈鳩之愛均壹於兒女
諸兒既及成人相與扶植以不墜祖父之緒則母訓之
故也年過八十曾孫如堵含飴戲綵婆婆笑語蓋一身

之所關實衆福之攸聚尚安享於期頤胡奄成於千古
嗚呼哀哉風木不停駒隙易度垂畢素冠三年之喪不
忍靈車一日之去恍音容其在堂飈丹旌其欲舉一酹
號攀終天悲慕嗚呼哀哉嗚呼痛哉

老人祭亡嫂阮氏文


嗚呼吾父在時德厚福全三子七孫競爽滿前婦姑妯
娣肅然懽然門無哭聲二三十年吾父既喪仍歲憂苦
首哭吾妻繼哭吾母若弟若兄俱淪千古諸猶子中亦

不堪數特有嫂氏為家典刑粹言懿行蘭椒其馨歲時
上壽疊綵照庭環數百指藹如春榮逾七望八亦既備
福晚哭冢子遽棄華屋銘旌聯翩子先母續遮道祖酹
老淚可掬

同日祭百二姪文

嗚呼吾與汝父友愛純切記屬續時握手嗚咽謂令兄
弟可惜作別言猶在耳念輒痛絕惟汝克家子姪之傑
不有渥洼無此汗血每見汝來紫髯紅頰如見汝父我

心則悅牖密蜂勞巢成燕怯諱病莫告汲海欲竭修程
方開出門軸折母病在牀尋亦永訣吾年寢高晨星孤
月何忍見汝母子俱發祖道一卮春甕初醲汝能飲否
我懷如割嗚呼哀哉



平齋集卷三十二